

Муфтий ҳазратлари Жазоир элчисини қабул қилдилар



19:48 / 05.06.2023 981

Бугун, 5 июнь куни Ўзбекистон мусулмонлари идораси раиси, муфтий Нуриддин домла ҳазратлари Жазоир республикасининг Ўзбекистондаги фавқулодда ва мухтор элчиси Бумедиан Геннадни қабул қилдилар.

Муфтий ҳазратлари Элчи жанобларини ташрифи билан қутлаб, Жазоир ҳам давлатчилик шаклига кўра мамлакатимизга яқинлиги, мазкур давлатнинг диний соҳадаги тажрибасини ўрганиш ниҳоятда аҳамиятли экани, шу боис Ўзбекистон мусулмонлари идорасининг Жазоирдаги расмий диний ташкилотлар билан ўзаро алоқасини ўрнатиш, икки томонлама манфаатли йўналишларда ҳамкорлик қилишдан мамнун бўлишини бирдирдилар.

Ўз сўзлари давомида Муфтий ҳазратлари кейинги йилларда юртимизда барча йўналишлар қатори диний-маърифий соҳада ҳам катта ижобий ўзгаришлар бўлаётгани, жумладан, зиёратчиларимизни умрага чекланмаган ҳисобда юбориш йўлга қўйилгани, ҳаж сафари квотаси ҳам йилдан-йилга ошириб борилаётгани, фуқароларга Қуръони карим ва тажвидни ўргатиш ишлари тизимли йўлга қўйилгани, диний таълим

муассасаларида фан дастурларини сифат ва мазмун жиҳатдан такомиллаштириш борасида режали ишлар қилинаётганини алоҳида қайд этдилар.

Ўз навбатида Элчи Бумедиан Геннад ҳам кўрсатилган эҳтиром ва самимий қабул учун миннатдорлик билдириб, ўзаро манфаатли алоқаларни ривожлантиришга бор куч-ғайрати, билими ва тажрибасини қаратишга тайёр эканларини изҳор этдилар.

Шунингдек, Элчи жаноблари Жазоирдаги диний-маърифий соҳа ҳақида маълумот бериш билан бирга, икки давлат диний соҳа ходимлари мазкур йўналишда, хусусан, диний таълим, имомлар малакасини ошириш, илмий тадқиқотлар бўйича ҳамкорлик қилиш имкониятлари мавжудлигини алоҳида таъкидлади.

Учрашув якунида Элчи жанобларига Ўзбекистон мусулмонлари идорасининг эсталик совғаси тақдим этилди.





